

Carta Cha Cu Uvi Cha Sacuhun Ra Apóstol Pablo Chi Ra Timoteo

**Nu tyaq̄ ra Pablo noo
tutu chi ra Timoteo**

1 Yuhu ra Pablo cuví noo apóstol ra Jesucristo vatyí tachí ra chii na caque tyiño ra. Vatyí tyicuan caa cuñí maa Nyoo, tyí cuñí ra cha sacote chi ñáyiví vatyí chahá ra noo ñayiví chaa chi tandíhi ñu cha ndu iñ ri chihin ra Cristo Jesús vatyí nacuhva cuenda ñu chi ñu chi ra. ²Tyaí tutu ihya chi yoho Timoteo. Ta cuñí xain chuun tyí tari cha sehi cuví chuun. Ta cuñí vatyí Nyoo Sutu yo ta Sutu Mañi yo Jesucristo na nasoco ra chuun. Ta na nyehe ndahvi ra chuun. Ta na coo ca cha taxi ri cuñi añimon saha ra.

**Nu catyí ra Pablo chi ra Timoteo
tyí nacatyí ra chi ñáyiví tyí
cuenda ra Cristo yihí ra**

³Tyicuan ri nicohón iñi tuhun yoho cuhva cha chicán tahvi chi Nyoo ñicahñu ta cha cuaa. Ta nacuhvé tyahvi nyoo chi ra cha cuendon. Nu maa ra sacuví yuhu tyiño chihin cha vaha chicá xiñi, tari sacuví tucu ñáyiví chii ta cha naha. ⁴Tyicuan ri nicohón xaan iñi

chuun ta nicohón xaan iñi tuhun yoso caa chacun quivi cuachiye chiña. Ta cuñí xain nyehi chuun inga chaha ta cusii iñi chuhun.

⁵Vatyí nicohón iñi yoso caa chingo xaan iñi cu Loida chiton chi Nyoo, ta cu Eunice sihun ñandíhi. Tyicuan caa tucu yoho chinó xaan iñun vityin.

⁶Yucuan chaha chahí tuhun chuun vatyí na saniun iñun ta cotyiño nyatu cha cahun tuhun Nyoo cha chahq̄ ra chuun quivi tyisé ndahi sicun. ⁷Nyoo ña chahq̄ ra cha yuhvi yo. Soco chahq̄ ra noo tunyee iñi cahnu chi yo. Ta chahq̄ ra vatyí cuñí yo chi tahan yo. Ta chahq̄ ra cha cunyaca ñaha vaha yo chi yo. ⁸Yucuan chaha ma cahan nuun cahun tuhun Sutu Mañi yo. Ta ni ri cha ma cahan nuu cha cuenda cha ñohí vehe caa cha cuenda ra. Soco chihin tunyee iñi chahq̄ Nyoo chuun ta chihin cha iyó vaha iñun cunyeun tindoho cha vachi siquí yo cha cuenda tuhun Nyoo. ⁹Vatyí ican ra sacacū chi yo. Ta nacana ra chi yo vatyí coo yo noo ñayiví ii. Ñima cha cuenda cha vaha cha sacuví yo ta nacana ra chi yo, soco vatyí tyicuan caa tyaq̄ ra cuhva

nyata ni cumañi ca chinqo ñuhu ñayivi. Vatyí nya quivi cuan cuñi ra chi yo cha iin ri cuví yo chihin, ra Cristo Jesús. ¹⁰Ta vityin cha quichi ra Jesucristo sacacu ra chi yo, nacoto yo vatyí tyicuan caa cuñi ra chi yo. Ta nu quichi ra, satani ra tandihi tunyee iñi cha iyó chi tuhun chihí. Ta chihin tuhun vaha cahān ra, tavā ra nu ndichin tuhun cha coo yo noo ñayivi chaa cha yori cuví sativi.

¹¹Nyoo tyaa ra tyiño chii vatyí cahin tuhun ihya chihin ñayivi. Tachi ra chii vatyí cuvi noo apóstol chi ra, ta sañahí chi ñu cha ñima ñu Israel cuví. ¹²Yucuan chaha nyehí tandihi tindoho ihya. Soco ña cucahān nui vatyí chitó mai yóo chi chinó iñi. Vatyí nacuhva cuende chii chi ra, ta chitó vahi vatyí cuví saha cuenda ra chii nyacua nya quivi quichi tucu ra.

¹³Cunyicon tuhun vaha cha chahi chuun. Ta cōun chihin cha chinó vaha iñun chi Nyoo. Tyicuan ri cunūn chi ñayivi tahan yo. Vatyí yucuan cuví cha chahá Nyoo chi yo tyi iin ri cuví yo chihin ra Cristo Jesús. ¹⁴Ta maa Tatyí Ii cha iyó añima yo na tyinyee chuun ta saha cumun tuhun vaha cha chahā Nyoo chuun.

¹⁵Cha chitón vatyí tandihi ra ityi Asia chiña casandoō ra chii, tari ra Fígelo ta ra Hermógenes. ¹⁶Soco ra Onesíforo na nyehe ndahvi Sutu Mañi yo chi ñayivi chi ra vatyí cuaha xaan chaha quichi sandunyeer ra iñi. Ta ña cucahan nuu ra cha cuenda cha ñohí vehe caa. ¹⁷Soco quivi chinyaa ra ñuu Roma ihya, ña sandihí ra tuhun cha nanducu ra

chii nyacua nya cha nañihí ra chii. ¹⁸Sutu Mañi yo nacuhva ra cha ñihi ra tumañi iñi quivi cha cutuñi chi yo nuu ra. Chitó vahun yoso cuhva tyinyee ra Onesíforo chi yo nya ñuu Éfeso chiña.

Noo sindaro vaha ra Jesucristo

2 Ta yoho sehe luhli, sandunyeer iñun chihin tunyee iñi cha chahá ra Cristo Jesús chuun cha cuenda cha iin ri cuví yo chihin ra. ²Tuhun cha chiñun cha cahin nuu cuaha ñayivi, nacatyí chi ra cha ñi iñi chinó iñi chi Nyoo, ra cha cacuví sañaha chi inga ñu.

³Ta cunyeun tindoho tari noo sindaro vaha ra Jesucristo. ⁴Ni noo ra cuví sindaro ta ma cuvi tyihi ra chi ra chihin inga tyiño. Vatyí cuñi chi sacuvi ra maa maa ri cha catyí ra cuví nuu chi ra. ⁵Ta tyicuan caa tucu ra canyasiquí, ma saha canaa ra cha tahán chi saha canaa ra tatu ma cunyasiquí ra tari cuhva tahán chi. ⁶Noo ra sahá tyiño chichi cuhu, tahán chi cha saha tyiño xihna ra, yucuan ta cachi ra cha quitá nu iyó tyiño sahá ra. ⁷Čaca xiñun tuhun cha catyí chuun ihya, ta maa Sutu Mañi yo cucuhva ra cha cutuñi iñun tandihi.

⁸Ñicohon iñi tuhun ra Jesucristo, ra cha nandoto cha yahā nyehe ra tindoho ta chihí ra. Cuví ra tata rey David. Ta ican ihya cuví tuhun Nyoo cha cacu añima yo cha chahā ra vatyí cahin tuhun. ⁹Ta cha cuenda tuhun ihya cunyeí tandihi tindoho nyacua nuhñi chihin cadena tari noo ra quiñi iyó. Soco tuhun Nyoo ña nuhñi chi. ¹⁰Yucuan chaha cunyei tandihi tindoho cha

cuenda cha vaha chi tandihí ca ñu nacachi Nyoo chi, tacuhva vatyí cuví cacu tucu tandihí ñu. Chihin cha ndu iñ ri yo chihin ra Cristo cuacacu yo ta cuñihi yo noo nu tyaquí xaan cha ma ndihí ca maa.

¹¹ Ihya cuví cha ndicha xaan:

Tatu cúvi yo cha cuenda ra, coo tucu yo chihin ra.

¹² Tatu cunyeé yo tindocho, cucunyaca ñaha yo chihin ra.

Tatu catyí yo tyi ña yihí yo cuenda ra, maa ra cucatyí ra tyi ñima ñáyivi cuenda ra cuví chi yo.

¹³ Tatu sandoq yo chi ra, soco maa ra tyicuan ri sacuví ra cuhva catyí ra.

Vatyí maa ra ña tuhvá ra nasama ra tuhun cahán ra.

Tatu sahá tyiño vaha yo, cuaquita vaha yo

¹⁴ Sanicohun iñi ñu tuhun ihya, ta catyun chi ñu chihin nuu Sutu Mañi yo na sandihí ñu cha cuví yuhu ñu cha ñima ri tuhun. Vatyí cha cuví yuhu ñu tyehe caa, ñahri maa tuhun. Tyi sativí ñu chi ñu tyasohó tuhun cahán ñu. ¹⁵ Saniñun ta cuhva cuendon chuun nuu Nyoo tari noo ra sahá tyiño vaha. Vatyí ñahri cha cucahan nuun tatu chotyíño vahun tuhun ndicha yoso cuhva tahán chi. ¹⁶ Ñaha tyasohun tuhun cha ñima ri tuhun ñáyivi ihya. Vatyí ñahri maa tyinyeé chi chi yo. Soco sativí ca chi chi yo nuu Nyoo ¹⁷ vatyí tari quihvi xico ndiyi noo nu cahvi, tyicuan caa cuví tuhun cuan vatyí sativí chi chi yo. Ta cuaha ñu cuativí cha cuenda cuan. Ican cuví cha cuví chi

ra Himeneo ta ra Fileto. ¹⁸ Vatyí caquita caxiin ra ityi vaha ta catyí ra vatyí tari quivi cha yaha nandoto yo ta ma nandoto ca coño ñuhu yo. Ta tyicuan caa satondo ra cuhva chinó iñi suhva ñu. ¹⁹ Ta vasi yihí ñu nducaxiin ñu, soco Nyoo chacun ra cha ndicha, ta yucuan cuví cha ma nasama maa. Ta nyisó chi noo seña cha catyí: “Sutu Mañi yo ñohó nuu ra chi ñu cuenda ra.” Ta catyí tucu chi: “Tandihí ñu nyisó sivi ra Cristo na quita ñu nu quiñi caa.” ²⁰ Chichi noo vehe cahnu, ñima maa maa ri ndaha tyiño chino chihin xuhun cuaan ta xuhun cuichin iyó. Iyó tucu cha chino chihin vitu ta chihin nyahyu. Yihí cuan chotyíño ñu chi nu vaha, ta yihí cuan cha chotyíño ñu nu ñima ri tuhun. ²¹ Tyicuan caa tucu maa yo tatu ña tñn cuenda yo tuhun cha ñima ri tuhun ñáyivi ihya, cuví yo noo ñáyivi cha chotyíño Nyoo chi, tari noo vaso xuhun cuaan. Ta cuñí chi vatyí cundií vasu cuan, tyicuan ta cuví cotyíño ra chi yo cha cuenda tandihí nuu vaha.

²² Ma caca xiñun tari chicá xiñi ra tyivaa ñáyivi ihya. Vatyí maa maa ri cha quiñi caa chicá xiñi ra. Coo noo ñáyivi cuiti. Chino vaha iñun chi Nyoo. Cuñun chi Nyoo ta chi ñáyivi. Coo taxi run chihin tandihí ñu yihí cuenda Nyoo, ñu cha chihin cha vaha añima chicán tahvi chi Sutu Mañi yo. ²³ Ta ma quichahun tuhun cha ñima ri tuhun cha cuví yuhu ñáyivi. Vatyí chitón tyi chihin cuan cacú tisihi. ²⁴ Ta noo ra sacuví tyiño nuu Sutu Mañi yo, ña tahán chi cañi tahan ra. Soco tahán chi cha vaha ñáyivi cuvi ra

chihin tandihi ñáyivi. Ta cuñí chi cha ñihi vaha ra cuhva sañaha ra tuhun Nyoo. Ta cuñí tucu chi cha cama cuvi iñi ra chihin ñáyivi. ²⁵Ta chihin cha masu iñi ra cuñí chi cha sandundoo ra chi ñáyivi ndava iñi. Ta cuatu ra nasama Nyoo cuhva iyó ñu ta nacoto ñu cha ndicha. ²⁶Ta tyicuan caa ta cunducachi iñi ñu ta cuaquita ñu chichi ndaha ra cuví cuihna vatyí cha vityin nyacuví maa ra yoso cuhva cuñí ra chihin ñu.

Yoso caa cucoo ñáyivi nu cuandihi ca quivi

3 Ta cuñí tucu chi coton vatyí nu cuandihi tyembu cuquichi quivi cha yíi xaan coo yo. ²Vatyí cucoo ñáyivi ñu cuñí xaan suri chi maa. Ta cucuñi xaan ñu xuhun. Ta yaa xaan cucuvi ñu. Ta cahnu cusaha ñu chi ñu. Cucahan ña vaha ñu siqui Nyoo. Ta ma quichaha ñu nu cahán sutu ñu ta sihi ñu. Ma nacuhva ñu tyahvi nyoo chi Nyoo, ni chi tahan ñu. Ma quichaha ñu chi Nyoo. ³Ma cuñi ñu chi tahan ñu. Ma coo ticahnu iñi chi ñu chihin ñáyivi. Cuñi ñu cuendu. Ma cuvi cunyaca ñaha ñu coño ñuhu ñu. Xaan xaan cucuvi ñu. Ta ma cuñi nyehe maa ñu cha vaha. ⁴Cunaxico tuhun ñu chi tahan ñu. Ta ndava xaan cucuvi iñi ñu. Ta cucaña iñi ñu sacuvi ñu ñáá ndihi cha cuñí ñu. Ta maa maa ri cha quichi cuvi iñi ñu cunanducu ñu, ta ma nanducu ñu chi Nyoo. ⁵Cunyicon ñu noo cuhva tari cha chinó iñi ñu chi Nyoo, soco ña ndicha ñu. Vatyí chasí ñu cha sañahá Nyoo tunyee iñi ra. Ma cutahun chihin ñu caa

tyicuan caa. ⁶Vatyí mahñu ñu ihya iyó ra cha quihvi ra chichi vehe ta sandavi ñaha ra chi ñusihi cha ñahri cha chiñi tuñi xiñi. Ta nyisó ñusihi cuan cuatyí, vatyí nyicón ñu tandihi cha quichi cuvi iñi ñu. ⁷Tyicuan ri cuñí ñu coto ñu tandihi tuhun chaa soco ña cuví cutuñi iñi ñu ñáá cha cuvi cha ndicha. ⁸Ta ñu cucoo cha cahin tuhun ihya, cucuvi ñu tari maa ra Janes ta ra Jambres, ra tasi cha cachiyo ta cha naha. Ta cuñi ra saha canaa ra chi ra Moisés. Ta tyicuan caa tucu ñu cucoo nu cuahan ca chi. Ma tahan iñi ñu sacuvi ñu cha vaha. Quiñi cucaca xiñi ñu. Ta ma chino iñi ñu cha vaha. ⁹Soco cuhva cunyacuvi ñu ma cuvi cutya chi vatyí ña xehe caa tyi cha ñima ri tuhun cuví cha cusacuvi ñu, tari cha chinyacuví ra Janes ta ra Jambres.

Nu ndihi tyatyíño ra Pablo chi ra Timoteo

¹⁰Soco yoho chitó vahun tyi yuhu ñima tyicuan caa iyé. Vatyí chitón tuhun cha sañahí, ta cuhva iyé. Ta chitón ñáá cha nanduquí ta yoso cuhva chinó iñi chi Nyoo. Ta chitó tucun yoso caa cunyeé iñi cha cahán ñáyivi chii. Ta chitón yoso cha cuñí chi ñu. ¹¹Ta chitón yoso caa cunyeé tindoho nu chicán nyicon ñáyivi chii. Chitón cha cuví chii, tandihi tindoho cha nyehi cha catyí tuhun Nyoo ñuu Antioquía, ta ñuu Iconio, ta ñuu Listra. Soco Sutú Mañi yo sacacu ra chii chichi tandihi cuan. ¹²Cha ndicha cuví vatyí tandihi yo cha cuñí yo coo yo cuhva cuñí ra Cristo Jesús cunyehe yo tindoho saha ñáyivi. ¹³Soco

ñu quiñi iyó ta ñu sandaví ñaha, quiñi xaan ca cunanduvi ñu. Vatyí cusandavi ñaha ñu chi ñáyivi ta cusandavi ñaha ñáyivi chi ñu.

¹⁴Soco yoho sañihun coun chihin cha cutuhvon. Vatyí chitón yóo cha sañahá chuun ta chitó vahun tyi cha ndicha cuví. ¹⁵Nya ta ni luhlun ta chitón cha nyaá nu tutu tuhun Nyoo. Ta yucuan cuví cha chahá cha cutuñi ca iñun tacuhva cacun cha cuenda cha chinó iñun chi ra Cristo Jesús. ¹⁶Tandihí tuhun cha nyaá nuu tutu Nyoo, ta maa Nyoo chahá. Ta tyinyeé xaan chi chi yo nacoto yo yoso caa tahán chi chinó iñi yo. Sañahá chi chi yo cuhva caa yo. Sandundoó chi chi yo. Ta sañahá chi chi yo yoso caa coo yo noo ñáyivi vaha nuu Nyoo. ¹⁷Tyehe caa tyinyeé tuhun Nyoo chi yo tacuhva vatyí cuví yo noo ra cuiti cuenda Nyoo. Ta cuatu tuhva yo sacuvi yo tandihí cha vaha.

4 Tyatyíne chuun nuu Nyoo ta nuu Sutu Mañi yo Jesucristo, vatyí maa ra cusandaa ra cuatyí ñu nyitó ta ñu chihí quivi quichi ra cunyaca ñaha ra chihin tunyee iñi ra. ²Çahan tuhun Nyoo chihin ñáyivi. Tyicuan ri sañiñun sacuvun. Çahan tuhun Nyoo nuu ñu tatu chahá chi cuhva o vasi ña chahá chi cuhva. Çuhva tuhun chi ñu, çatyí cuhva caa ñu tacuhva cunyicon vaha ñu chi ra Cristo. Ta cuatun nasama ñu cuhva iyó ñu chihin cha cama iñun. Ta sañahun chi ñu yoso caa tahán chi coo ñu. ³Vatyí coo quivi ma cunyee ca iñi ñáyivi tyasoho ñu tuhun vaha. Soco cunducu ñu cuaha xaan ra sacuaaha cha sañahá maa maa ri

cha tahan iñi maa ñu cuiñi ñu. ⁴Ta cusacuachiyo xiin ñu cha ndicha. Ta cucuñi ñu cuiñi ñu noo tuhun cha ña ndicha. ⁵Soco yoho saha cuenda chuun chihin cha vaha chica xiñun. Çunyeun tindoho. Çahan tuhun Nyoo chihin ñáyivi. Sacuvi vahun tyiño chahá Nyoo chuun.

⁶Yuhu cha cuñí cuii ri nacuhva cuende ñáyivi cha cuenda tuhun Nyoo, vatyí cha nyañaa yatyin tuhun chihí chii. ⁷Cha cañi tahn tari cuhva tahán maa chi ta cha sandihí tyiño cha chahá Nyoo chii. Ta ña sandihí tuhun cha chinó iñi chi ra. ⁸Ta vityin nu cuahan ca chi quivi, nyatú tuhva noo cha tahán chi chii cha cuacuhva Sutu Mañi yo chii. Ta ñima chi maa ri mai cuhva ra, soco cuhva tucu ra chi tandihí ca ñu cha nyatú chi ra. Vatyí noo ri maa ra cuví ra vaha sacutuñi.

Nonga tyiño tyaa ra Pablo chi ra Timoteo

⁹Sañiñi ta quichun cha numi ri, quichi nyehun nu nyai. ¹⁰Vatyí ra Demas sandoo ra chii vatyí cuñi ca ra cha iyó ñáyivi ihya. Ta cuahan ra nya ñuu Tesalónica. Ta ra Crescente cuahan ra nya ityi Galacia. Ta ra Tito cuahan ra ityi Dalmacia. ¹¹Noo ri maa ra Lucas nyaá chihin. Nanducu chi ra Marcos ta na quichi ra chuhun quivi quichun. Vatyí chiñuhú xaan ra chii nu tyiño Nyoo. ¹²Tachí chi ra Tíquico ñuu Éfeso. ¹³Quivi quichun cuison sahma cocon cha sandoi ñuu Troas vehe ra Carpo. Tyicuan caa tucu libri, quihí ndahun quichi. Ta cha niñi ca tuti. ¹⁴Ra Alejandro ra cañi mityi cuan, cuaha xaan cha ña vaha chinyacuví

ra chihin. Ta maa Sutu Mañi yo cutyiyahvi chi ra cha cuenda cha chinyacuví ra chihin. ¹⁵Saha cuenda chuun chihin ra. Vatyí xaan xaan cuñí ra siqui tuhun Nyoo cha cahán yo.

¹⁶Cha xihna ri quívi sacaqí chii nuu ra cuví tyiño, yori maa tyinyee chii. Casandoḡ noo tuhun maa ra chii. Na saha Nyoo ticahnu iñi chi ra cha cuenda cuan. ¹⁷Soco Sutu Mañi yo tyinyee xaan ra chii. Ta chaha ra tunyee iñi chii tacuhva cuví cahan cachi tuhun ra nuu ñu, ta chiñi tandíhi ñu cha ñima ñu Israel cuví. Ta sacacu Nyoo chii cha cachi ndicaha chii. ¹⁸Ta cuasacacu ca ra chii ndaha tandíhi cha ña vaha. Ta cuasaha cuenda ra chii nyacua nya nachaa quívi cunyai

chihin ra nu nyaca ñaha ra. Chi maa ra na sacahnu yo tyicuan ri maa. Ta na cuvi chi tyicuan caa.

Nu ndíhi cahan ra Pablo ta chaha ra nocumi chi ñu

¹⁹Ihya vachi nocumi chi cu Prisca ta chi ra Aquila ta chi ñáyivi chi ra Onesíforo. ²⁰Ndoḡ ra Erasto ñuu Corinto. Ta ndoḡ ra Trófimo ñuu Mileto vatyí cuhví ra. ²¹Sañiñun ta quichun cha ni cumañi ca chaa yoo vichin.

Vachi nocumi chuun sahá ra Eubulo ta ra Pudente ta ra Lino ta cu Claudia ta tandíhi ca ñáyivi tahan yo cuenda Nyoo ihya.

²²Na cunyaa Sutu Mañi yo chuhun. Ta Nyoo na nasoco ra chi tandíhi ndo.